

Uunga siunnersuut:

Erngup imernejarsinnaasup pitsaassusia aamma imermik pilersuiviit nakkutigineqarnerat pillugit Namminersorlutik Oqartussat nalunaarutaat

Avatangiisit innarlitsaaliorneqarnissaannik Inatsisartut inatsisaanni nr. 9-mi, 22. november 2011-meersumi, Inatsisartut inatsisaanni nr. 16, 1. december 2021-meersumi allanngortinneqartumi, § 10, imm. 1, nr. 12, 19 aamma 22, § 34, § 56, imm. 1, aamma § 66, imm. 3, Inatsisartut inatsisaanni nr. 16-imi 1. december 2021-meersup allanngortinneratigut aalajangersarneqarput:

Kapitali 1

Atuuffii nassuiaatillu

§ 1. Nalunaarummi matumani imeq imernejarsinnaasoq, imermik pilersuivinnit nalinginnaasuniit allaniillu pilersuutigineqartoq pineqarpoq.

Imm. 2. Atuuffiit tulluittut imeq sukuluiagaanngitsoq- aamma imernejarsinnaasoq nalunaarummut ilaatinneqanngillat, taakku inatsimmi allami ilaatinneqarmata:

- 1) Imeq sukuluiagaanngitsoq siunertanut, atuisut peqqissusaannut toqqaannartumik toqqaannanngitsumilluunniit sunniuteqartunut atorneqartoq, imaluunniit uumasunut imissatut atorneqartoq.
- 2) Imeq sukuluiagaanngitsoq imerlu imernejarsinnaasoq, nakorsaatitut atorneqartoq.
- 3) Imeq imernejarsinnaasoq, puiaasanut allanulluunniit poorlugu tuniniarneqartoq.

Imm. 3. Nalunaarummi imermut imigassamut piumasaqaatit imermut imaaneersumut imaluunniit imermut tarajoqanngitsumut, imermik imigassamik atuinissaq pillugu piumasaqaateqartoqarsimatinngu, atuutinngillat.

§ 2. Nalunaarummi matumani imatut paasineqassapput:

- 1) Imeq imernejarsinnaasoq:
Erngit qanorluunniit ittut, suliarineqarsimasut suliarineqarsimanngitsullu, imertut imernejarsinnaasut, nerisassiornermut atorneqarsinnaasut, nerisassanik piareersaanermut angerlarsimaffimmiluunniit siunertanut allanut atorneqarsinnaasut, erngup suminngaanneernera apeqqutaatinnagu.
- 2) Imeq sukuluiagaanngitsoq: Imeq salinneqanngitsoq, pilerfimmunit qanoq ittuunera apeqqutaatinnagu pinngoqqaarnerminiilli imermik imernejartussamik

pilersitsinermi atorneqarsinnaasoq, taakkununngalu imeq tatsineersoq, imeq nunap iluaneersoq, imeq tarajulik aamma sersersuup sermitaanit aassimasumeersoq ilaatinneqarput.

3) Imermik tigooraaviit: Atortoq, imermik sukuluiarneqanngitsumik, imilerivimmi imermik sukuluiagassamik tigooraanermut atorneqartartoq. Imermik milluaanermut sukuluaat assigiinngitsunik ilalinnik katitigaasimasinnaavoq, taakkununngalu qillerinerit, puilasuliat, sapusiat, erngup isaavia, imermik sukuluiagassamik milluaaviit aamma erngup sukuluiagassap aqqutai ilaapput.

4) Imermik sukuluaaviit: Sukuluaavik, erngup imerneqarsinnaasutut atorneqarsinnaanissaa siunertaralugu erngup sukuluiagassap suliarineqartarfia. Imermik sukuluaavik arlalinnik immikkoortoqarsinnaavoq, taakkununngalu imermut sukuluiagassamut tankit, silaannalersuisarfiit, nakkartitsiviit (kiversaavik), minguaaviit, tappiorannartunik unerartitsiviit, uv-mik qinngortitsiviit, akuutissanik kemiskiusunik (klor, soda il.il.) akoorinermi uuttuviit, imermut imerneqarsinnaasumut tankit, kuutsitsiviit, tarajuaaviit aassiisarfiillu.

5) Imermik pilersuiviit: Suliarinnittarfik 1-imik arlalinnilluunniit matuma kinguliani taaneqartunik immikkoortortalik: Imermik milluaaviit, imermik sukuluaaviit kiisalu erngup aqqutai pingaarnert. Imermik pilersuiviit imermik milluaatinik arlalinnik sananeqaateqarsinnaavoq.

6) Imermik pilersuiviit nalinginnaasut: Imermik pilersuiviit, illoqarfinni nunaqarfinniluunniit imaluunnniit pisortat suliaannut niuernermilluunniit tunngaveqarluni sulianut imermik imerneqarsinnaasumik pilersuisuusut, taakkununngalu suliffeqarfiit inuussutissanik avammut tunisassanik suliaqartut ilaatinneqarput.

7) Imermik pilersuiviit allat: Imermik pilersuiviit, imermik pilersuiviit nalinginnaasunik taagorneqartut avataanniittut.

8) Erngup aqqutai pingaarnert: Erngup aqqutai, imermik imerneqarsinnaasumik imermik sukuluaavinniit imertartarfinnut, qatserisartut imermut atassusiisarfiinut ikkuffinnnullu pilersuisuusut.

9) Erngup aqqutaanut ikkuffiit: Erngup aqqutai, erngup aqqutaanit pingaarnermiit illup imermut atortulersuutaanut atassusiisut.

10) Illuni imermut atortulersuutit: Illup iluani silataaniluunniit atortulersuutit, imermik imerneqarsinnaasumik siaruarternermut atorneqartartut, taakkununngalu imermut tankit, ruujorit, katiterissutit, ventiilit kuutsitsiviillu ilaatinneqarput.

11) Ingerlatsinermik nakkutilliineq: Suliffeqarfiup iluani erngup pitsaassusaanik nakkutilliineq, akoorinermik nakkutilliineq nakkutilliinermilu suliniutit allat,

ingerlatsisup sulisuisa kapitali 3-mit piumasaqaatit naapertorlugit isumagisaat.

12) Ingerlatsinermit allattaaviit: Allattaaviit, ingerlatsisup ingerlatsineq pillugu paasissutissanik § 12-imi piumasarineqartunik ingerlaavartumik nalunaarsuiffigisai.

13) Ingerlatsisoq: Inuk imaluunniit inatsisilerisoq, imermik pilersuiviup ingerlanneqarneranut akisussaasuusoq.

14) Imermik imerneqarsinnaasumik isumannaallisaanissamut pilersaarutit: Pinaveersaartitsinermit pilersaarutit, imaluunniit suleriaatsit, imermik imerneqarsinnaasumik milluaanermi, sukuluiaanermi siaruarterinermilu ulorianartorsiorfusinnaasunik suussusersinissamut annikillititsinissamullu siunertaqarfiusut.

15) Nakkutilliinermit oqartussaasut: Naalakkersuisoqarfik avatangiisinut suliaasaqarfimmut akisussaasuusoq.

Kapitali 2

*Imermut sukuluiaqassamut imerneqarsinnaasumullu piumasaqaatit
kiisalu atortut imermut attuumasut*

§ 3. Imermik sukuluiaqassamik isumalluutit nutaat atorneqalernissaat sioqqullugu erngup sukuluiaqassap pitsaassusia nakkutilliinermit oqartussaasunit akuerineqassaaq, ilanngullugu imermut sukuluiaqassamut nutaamut misissugassat ilanngussaq 4-imi piumasarineqartut tunngavigalugit.

Imm. 2. Ingerlatsisup qinnuteqareerneratigut akuersissut tunniunneqassaaq, tassanilu erngup sukuluiaqassap pisariaqanngitsumik peqqissutsimut pilersuinerulluunniit isumannaassusianut ulorianartorsiorfitsiviunngitsumik imermik imigassamik, ilanngussat 1-miit 3-mut pitsaassusissamut piumasaqaatinik naammassinnittumik, tunisassiornermut atorneqarnissaanissamut naammannissaa piumasarineqarpoq.

Imm. 3. Akuersissuteqarnermut atatillugu nakkutilliinermit oqartussaasut imermik sukuluiaqassamik isumalluuteqarfissatut siunnersuutigineqartumik nakkutilliinermit oqartussaasut pisariaqartutut isumaqarfigisaannik misissuinissamik piumasaqarsinnaapput, taakkunungalugu imermik sukuluiaqassamik isumalluuteqarfiup eqqaani imermik isumalluuteqarfiup nunataata nunap assiliornissaa ilaatinneqarpoq.

Imm. 4. Ingerlatsisoq allaluunniit imm. 1 aamma 2 naapertorlugu akuersissummut annertuumik isumalimmik, tassungalugu imeqarfiup killeqarfiup pioreersup allanngortinneqarnissaa ilanngullugu allannguinnissamut

qinnuteqartillugu, nakkutilliinermi oqartussaasut pisariaqartutut isumaqarfigisaannik misissuinissamik piumasaqarsinnaapput, taakkunungaluk imermik sukuluiagassamik isumalluuteqarfiup eqqaani imermik isumalluuteqarfiup nunataata nutaamik nunap assiliornissaa ilaatinneqarpoq. Nakkutilliinermi oqartussaasup taamatut allannguinnissamik qinnuteqartoq peqqusinnaavaat, misissuinerit ingerlanneqarnissaannut aningaasartuutitik matussuseeqqullugu.

§ 4. Imaq imerneqarsinnaasoq

- 1) peqqissutsimut ulorianartorsiortitsisinnaasutut annertussusilinnik eqimassusilinnillu tappiorannartoqassanngilaq akuutissanillu kemiskiusunik akoqassanani, aammalu
- 2) minnerpaamik tappiorannartunut akuutissanullu kemiskiusunut tunngavissat malillugit pitsaassuserititassatut piumasaqaatinik, ilanngussaq 1-miit 3-mut allassimasunik malinniffiussalluni.

§ 5. Imermi imerneqarsinnaasumi sumiiffinni ukunani pitsaassusissamut piumasaqaatit, § 5-imi taaneqartut malinneqassapput:

- 1) Imermik sukuluiaviit, erngup aqquataanni pingaarnerni, imertartarfinni tamanit atorneqartuni, biilini imermut tankilinni aamma umiarsuarni imermut tankilinni erngup aniaviini.
- 2) Namminersortut pisortallu imermik kuutsitsiviini imertartarfinnilu allani erngup aniaviini.
- 3) Suliffeqarfinni inuussutissaleriffiusuni sumiiffinni, suliffeqarfiup inuussutissanik tunisassiornerani imermik atuiffiusuni.

§ 6. Atortut imermik imerneqarsinnaasumik suliaqarnermut siaruarterinermulluunniit atorneqartut, aammalu imermut imerneqarsinnaasumut attuumasut erngup pitsaassusiata ilanngussaq 1-miit 3-mut erngup pitsaassusianut piumasaqaatinut uniuuttumik ajorseriarneranik kinguneqassanngillat.

Imm. 2. Atortut imm. 1-imi taaneqartut Danmarkimi imaluunniit EU-mi nunami allami suliffissuaqarnermi malitassat naleqquttut naapertorlugit imermut imerneqartussamut atuussinnaanissamut akuerineqarsimassapput uppersaaserneqarsimassallutilluunniit, taamaattoq takuuk imm. 3.

Imm. 3. Nakkutilliinermut oqartussat atortut imm. 1-imi taaneqartut suliffissuaqarnermi malitassat naapertorlugit akuerineqarsinnaanersut uppersaaserneqarsinnaanersullu aalajangiiffigisinnaavaat.

§ 7. Imermik pilersuivimmik ingerlatsisup ilanngussaq 1-miit 3-mut naapertorlugu imermik sukuluiaavinni, erngup aqqutaani pingaarnerni, imertartarfinni tamanit atorneqartuni, biilini imermut tankilinni aamma umiarsuarni imermut tankilinni imermik pilersuivimmik ingerlatsisoq nakkutiginnittuusoq erngup aniaviinut pitsaassusissamut piumasaqaatit malinneqarnissaannut qulakkeerinissaq akisussaaffigaa.

Imm. 2. Misissugassanik tigusiffiusumi pitsaassusissamut piumasaqaatit pissutsinik ingerlatsisumut tutsinneqarsinnaanngitsunik, tassungalu pissutsinik illumik piginnittup § 9 naapertorlugu piumasaqaatinik malinnissimannginnera ilanngullugu, peqquteqartut ingerlatsisup imermik pilersuiffimmik misissuinerit uppersarsinnaappagit, ingerlatsisup imm. 1 naapertorlugu pisussaaffini naammassisimassavai.

§ 8. Illumik sukkulluunniit piginnittup illumi imermut atortulersuutit ikkuffiillu peqqussutit malillugit suliarineqarsimanissaat akisussaaffigaa.

Imm. 2. Illumi imermut atortulersuutit ikkuffiilluunniit ilanngussaq 1-miit 3-mut erngup pitsaassusissaanut piumasaqaatit unioqqutillugit suliarineqarsimannginnissaannut ilaatigut qulakkeerinissamut illumik piginnittoq akisussaasuvoq.

Kapitali 3

Ingerlatsinermik nakkutilliineq ingerlatsinermilu allattaaviit

§ 9. Imermik pilersuivimmik nalinginnaasumik ingerlatsisoq erngup sukuluiagassap erngullu imerneqarsinnaasup pitsaassusaannik misissuisarnermi nakkutilliinermut pilersaarusiussaaq, tassungalu ilanngussaq 7-mi piumasaqaatit naapertorlugit ingerlaavartumik uuttuisarnermut pilersaarut ilaatinneqassaaq.

Imm. 2. Ingerlatsinermik nakkutilliineq imermik sukuluiaanermt, kiisalu erngup sukuluiagassap erngullu imerneqarsinnaasup pitsaassusaannik misissuinerup inernerinut naleqqussarneqartassaaq. *Imm. 3.* Imermik pilersuivimmik nalinginnaasumik ingerlatsisut aamma ilanngussaq 6 naapertorlugu erngup pitsaassusianut ingerlatsinermi nakkutilliinissamut pilersaarusioqqullugit nakkutilliinermi oqartussaasunit peqquneqarsinnaapput.

Imm. 4. Nakkutilliinermi oqartussaasut imermik pilersuivinnik allanik ingerlatsisut peqqusinnaavaat, ingerlatsinermi nakkutilliinermik, tunngavissanik erngup pitsaassusianut sunniuteqarsinnaasutut nakkutilliinermi oqartussaasut naliliiffigisaannik ilaqartinneqartunik pilersitseqqullugit.

§ 10. Erngup imerneqarsinnaasup pitsaaliuilluni illersorneqarnissaa qulakkeerniarlugu, imeqarfimmut nalinginnaasumut ingerlatsisut imermik pilersuiffinnut tamaginnut erngup imerneqarsinnaasup isumannaatsuunissaanut pilersaarutini piffissap ingerlanerani suliaqassapput, taamaalilluni kingusinnerpaamik ulloq 31. december 2025 imeqarfinnut ataasiakkaanut tamaginnut immikkut pilersaarut suliarineqareersimassalluni.

Imm. 2. Ingerlatsisup pilersaarutit immikkoortillugit suliarineqarnissaat toqqarsinnaavaa imaluunniit ingerlatsinermik nakkutilliinermut atatillugu allagaatinut pioreersunut ilanngussinnaallugit. Aammattaaq ingerlatsisup pilersaarutit annertussusaat imarisaallu najukkani pissutsit naapertorlugit allanngorartissinnaavai, ilanngullugit imileriviup ilusiligaanera pisariussusialu, sulisut amerlassusaat, erngup pilersuutigineqartup annertussusia, takuuk ilanngussaq 5, aamma imeq sukuluiarneqanngitsoq isumalluutaasoq atorineqartoq.

Imm. 3. Nakkutilliinermut oqartussaq pilersaarutit suliarineqarnerannut ingerlaavartumik nakkutilliissaaq, aammalu sioqqutsisumik ingerlatsisut aamma Nunatsinni Nakorsaaneqarfik akuutillugit pilersaarutitut malittarisassanik erseqqinnerusunik atuutsitsilersinnaalluni.

§ 11. Erngup imerneqarsinnaasup pitsaassusiani nalunaarummi matumani piumasagaatit malinneqanngitsut ingerlatsisup paasiguniuk, imaluunniit paasissutissat pioreersut naapertorlugit tamanna ilimagineqarpat, ingerlatsisup erngerluni nakkutilliinermi oqartussaasunut ilisimatitsinissaq qulakkiissavaa.

§ 12. Iermik pilersuivimmik nalinginnaasumik ingerlatsisoq ingerlatsinermi allattaavimmut allattuisassaaq.

Imm. 2. Uuttuinerit ilanngussaq 7-imi taaneqartut inernerit aamma ukununga paasissutissat ingerlatsinermi allattaavimmut allanneqartassapput:

- 1) soda-t chlor-it, akuutissat calcium-itallit uumasuaraajaatillu akuliunneqartut annertussusaat,
- 2) imermik pilersuivimmi misissuinerit,
- 3) imermik pilersuivimmi ajornartorsiutaasinnaasut, aamma
- 4) allat, erngup pitsaassusianut erngullu atuisunut suliffissuarnullu inuussutissalerivinnut siaruarterneqartup annertussusianut isumaqartut.

Imm. 3. Ingerlatsinermi allattaaviup naqitanngorlugu elektroniskinnorluguluunniit sivikinnerpaamik ukiuni tallimani pissarsiarineqarsinnaanissaa qulakkeerneqassaaq.

Imm. 4. Ingerlatsinermi allattaavimmut nalunaarsuinermi pappiaraq atorneqarpat, taanna ingerlatsisumit taassumaluunniit sinniisaanit atsiorneqassaaq.

Ingerlatsinermi allattaavimmut nalunaarsuinermi atortut elektroniskiusut atorneqarpata, kikkut allattaavimmut naqiterisuunersut allanneqartassaaq, taamatullu allattaaviup naqinneqarnerani atsiortoqassalluni.

Imm. 5. Nakkutilliinermi oqartussaasut ingerlatsisoq akuutillugu ingerlatsinermit allattaavinnut piumasaqaatinut tapiliussanik aalajangersaasinnaapput.

§ 13. Imermik pilersuivimmik nalinginnaasumik ingerlatsisup nakkutilliinermi oqartussaasut piumasaqarnerisigut saqqummiussinnaassavai:

- 1) Ingerlatsinermi allattaavik.
- 2) Imermut aqquteqarfinnut naaffiusinnaasunulluunniit takussutissiaq, imermik misissugassamik tigusiffiusut pillugit paasissutissartalik.
- 3) Ingerlatsinermit paasissutissat aamma teknikki atorlugu eqqiluisaarnermut paasissutissat, tappiorannartunik misissuinermi aallaaviusunik sumiissusersiornissamut isumaqartut.

Kapitali 4

Nakkutilliineq, misissugassanik tiguisarneq ulorianartorsiornernillu naliliisarneq

§ 14. Nakkutilliinermi oqartussaasut imermik pilersuivinnik nalinginnaasunik nakkutilliisussaapput. Nakkutilliinermi pineqarput:

- 1) Erngup imerneqarsinnaasup tappiorannartunut killigititassanik ilanngussaq 1-imi taaneqartunik akoqarnera, ilanngussaq 5-imi imermik misissugassanik tiguisarnerit misissueqqissaartarnerillu akulikissusaannut naapertuuttumik.
- 2) Erngup imerneqarsinnaasup kemiimut tunngasunut arrorsinnaasunut arrorsinnaangitsunullu killissarititassanik ilanngussaq 2 aamma 3-mi taaneqartunik akoqarnera, ilanngussaq 5-imi imermik misissugassanik tiguisarnerit misissueqqissaartarnerillu akulikissusaannut naapertuuttumik, kiisalu ilanngussaq 7 naapertorlugu ingerlatsinermit nakkutilliineq tunngavigalugu.
- 3) Imermik pilersuviit, taakkununga imeqarfiit ilusiligaaneri, atuuffii aserfallatsaaliugaanerisalu pitsaassusaat ilanngullugu.

Imm. 2. Nakkutilliinermi oqartussaasut aamma imermik pilersuivinnik allanik nakkutilliisinnaapput, tassungalu nakkutilliinermi oqartussaasut erngup imigassap ilanngussaq 1-miit 3 ilanngullugu pitsaassusissamut piumasaqaatinut naammassinninnginneranik isumaqarnissamut tunngavissaqarnerat ilaatinneqarpoq.

Imm. 3. Ingerlatsisup nakkutilliinermi oqartussaasut qinnuteqarnerisigut pissutsit imm. 1-imi taaneqartut pillugit paasissutissat, nakkutilliinerup naammassinissaanut pisariaqartinneqartut tamaasa tunniutissavai.

§ 15. Nunatsinni Nakorsaaneqarfik nakkutilliinermut oqartussaasunut siunnersuisassaaq, makkununga tunngatillugu:

- 1) ilanngussaq 1-miit 3 ilanngullugu pitsaassusissamut piumasaqaatit,
- 2) ilanngussaq 4 aamma 5-imi misissuisarnerup akulikissusissaa, kiisalu
- 3) § 20, imm. 3 aamma 4 naapertorlugit ajutoorfusinnaasunik naliliisarnermut aalajangersakkanik atuisarneq.

§ 16. Ingerlatsisoq ilanngussaq 4-mi erngup sukuluiagassap aamma ilanngussaq 5-imi erngup imerneqarsinnaasup tappiorannartunik akoqarneranik killissarititaasunik taaneqartunik misissuisarnermi akulikissutsinut tunngavissat, ilanngussaq 1-imi taaneqartut naapertorlugit misissugassanik tiguisassaaq misissueqqissaartassallunilu.

Imm. 2. Ingerlatsisoq ilanngussaq 4-mi erngup sukuluiagassap aamma ilanngussaq 5-imi erngup imerneqarsinnaasup kemiimut tunngasunut arrorsinnaasunut arrorsinnaanngitsunullu killissarititassanik, ilanngussaq 2 aamma 3-mi taaneqartunik akoqarneranik killissarititaasunik taaneqartunik misissuisarnermi akulikissutsinut tunngavissat naapertorlugit misissugassanik tiguisassaaq.

Imm. 3. Ingerlatsisup imermik misissugassatut tigusanik, imm. 1-imi aamma 2-mi taaneqartunik laboratoriamut, qitiusumik nakkutilliinermi oqartussaasunit misissuinissamut akuerisamut misissoqqissaagassanngorlugit nassiussinissaq akisussaaffigaa.

Imm. 4. Erngit misissugassat inunnit tamatumunga ilitersuunneqarsimasunit tiguneqartassapput.

Imm. 5. Iermik misissugassamik tigusisarneq ilanngussaq 4-mi ISO-mut pitsaassutissatut taaneqartunut piumasaqaatit naapertorlugit suliarineqartassaaq. Aamma imermik misissugassamik tigusisarnermi imermik misissugassamik tigusisarnermut ilitersuutit, laboratoriamit suliaqartussamit suliarineqartut malinneqartassapput, tassanili taamaallaat imermik misissugassamit tigusat, periaatsit allat § 17, imm. 1-imi taaneqartut atorlugit misissoqqissaarneqartussat pineqanngillat.

Imm. 6. Imm. 1-5-imut imermit misissugassatut tigusanik misissoqqissaakkat uuttukkallu, imermik pilersuivimmi nalinginnaasumi ingerlatsisumit kapitali 3

naapertorlugu ingerlatsinermik nakkutilliinermut atatillugu suliarineqartut ilaatinneqanngillat. Kisiannili nakkutilliinermi oqartussaasut misissueqqissaarnernut uuttuinernullu taakkununga, kiisalu ingerlatsisup ingerlatsinermik nakkutilliinerata pitsaassusissaannut sukkulluunniit piumasqaateqarsinnaapput.

§ 17. Nakkutilliinermi oqartussaasut imermik misissugassanut § 16, imm. 1-imi aamma 2-mi taaneqartunut misissueqqissaareriaatsit allat, nakkutilliinermi oqartussaasunit akuersissuteqarfigineqartut atorlugit misissoqqissaarneqarnissaannut akuersissuteqarsinnaapput, tassungalu pissutsit ingerlasussanik piareersaanermi aqutsinermilu ajornartorsiuteqartoqarnera peqqutaalluni imermik misissugassat, ISO-mut pitsaassuserititassat ilanngussaq 8-mi taaneqartut atorlugit misissoqqissaarneqarnissaannut piffissarititaasut malinneqarsinnaasannginnerat ilaatinneqarpoq.

Imm. 2. Imm. 1 naapertorlugu akuersissuteqartoqassanersoq naliliinermi, misissueriaatsinik allanik atuinerup erngup imerneqarsinnaasup pitsaassusaanik ajorseriartitsinnginnissaa, tassungalu ilanngullugu misissuisarnerup annertusineqarnissaa imaluunniit tutsuiginarnerusumik misissuisoqartarnissaa pingaartinneqassaaq. Taamatuttaaq imermik pilersuivimmi pineqartumi erngup imerneqarsinnaasup isumannaassusissaanut pilersaarusiortoqarnissaa pingaartinneqartussaavoq.

Imm. 3. Imermik pilersuivimmut, imermik inuussutissanik suliffeqarfinnut avammut tuniniagaqartunut pilersuisunut imm. 1 naapertorlugu akuersissuteqartoqarsinnaanngilaq. Imermik pilersuivinni taakkunani periaatsit allat, imm. 1-imi taaneqartut taamaallaat imermik misissugassanik tapertaasunik, nalunaarummi matumani misissugassanik tigusisarnermi piumasqaatit atuuttussat naammassiniarlugit tiguneqanngitsunik misissueqqissaarnermut atorneqarsinnaapput.

Imm. 3. Ingerlasussanik piareersaanikkut ajornartorsiuteqarnermi ISO-mut pitsaassuserititassani ilanngussaq 8-mi taaneqartuni piffissamut killissaliussat naammassineqarnissaat periarfissaqanngippat, tamanna misissueqqissaarnerup tutsuiginassusaanut sunniissasoq naliliisoqarsimanngippat, taamatuttaaq nakkutilliinermut oqartussaq piffissamut killiliussanik sivisunerusunik aalajangersaasinnaavoq. Piffissamut killiliussat sivisunerusut taamaattut imermik pilersuivinnut, inuussutissalerinermut suliffeqarfinnut avammut nioqquteqartartunut pilersuisunut, aalajangersarneqarsinnaanngillat.

§ 18. Ingerlatsisoq nakkutilliinermi oqartussaasut piumasaqarnerini imermik pilersuivimmi imermik misissugassamik tigusiiffiusut pillugit ilisimatitsissuteqassaaq.

§ 19. Ingerlatsisup sukkulluunniit nakkutilliinermi oqartussaasut makkununga isersinnaatissavai:

- 1) pisarneq malillugu imermik misissugassamik tigusinissamut
- 2) erngup pitsaassusaanik misissuinissamut imermik misissugassanik tapertaasunik tigusinissamut
- 3) imeqarfimmup misissornissaanut, ilanngullugu taassuma aaqqissuussaananeramik ingerlanneqarnerinillu misissuiissamut.

§ 20. Ingerlatsisup imermik misissugassamik tigusinissamut piffissat aalajangersassavai, taamaalilluni ukioq kaajallallugu, tassungalu ukiuunerani, upernaakkut nunap kuuffiani, aasaanerani aammalu ukiakkut sikunnginnerani erngup pitsaassusianik misissueqqissaarnerup inernerinik saqqummiussisoqarsinnaassalluni.

Imm. 2. Imermik misissugassamik tigusiisarnerit sapinngisamik piffissaq sumiiffillu eqqarsaatigalugit assigiiaartumik agguarneqassapput. Taamaattumik misissuinerup ingerlanneqarnissaanut aqqusersuutini kaaviiartumik tigusiiffissat arlallit toqqarneqassapput.

Imm. 3. Nakkutilliinermi oqartussaasut ingerlatsisup qinnuteqarneratigut ilanngussaq 4-mi aamma 5-imi misissugassanik tigusiisarnerup akulikissusiinik ikilisitsinissamik aalajangiisinnaapput. Kiisalu nakkutilliinermi oqartussaasut kemiimut tunngavissamik ilanngussaq 2-mi aamma 3-mi taaneqartumik ataatsimik amerlanerusunilluunniit missuinnginnissamik aalajangiisinnaapput.

Imm. 4. Imm. 3 naapertorlugu aalajangiinermi ilanngussaq 9-mi piumasaqaatit naapertorlugit ulorianartorsiorfinnik naliliinissaq pisariaqartinneqarpoq. Ulorianartorsiorfinnik naliliineq kommuninut pineqartunut imermullu imigassamut suleqatigiissitami § 34-mi taaneqartumi ilaasortanut allanut siumoortumik tusarniaassutigineqareernermini nakkutilliinermi oqartussaasunit akuerineqassaaq.

Imm. 5. Nakkutilliinermut oqartussap sioqqutsisumik ingerlatsisumut aamma Nunatsinni Nakorsaaneqarfimmut tusarniaaereluni, erngup imigassap pitsaassusaa qulakkeerniarlugu tamanna pisariaqartoq nakkutilliinermut oqartussaq naliliitillugu, ilanngussaq 4-mi aamma 5-imi misissuisarnerup akulikissusissai sivitsortissinnaavai.

Imm. 6. Najukkami imermik pilersuinermini pissutsini pisariaqartinneqarpat,

nakkutilliinermi oqartussaasut ingerlatsisumut aamma Nunatsinni Nakorsaaneqarfimmut tusarniaareerluni, ilanngussaq 1-miit 3-mut killissarititaasut saniatigut tappiorannartunut kemiimullu killissarititaasut allattorsimaffiat annertusisinnaavaat, taakkunungalu ilaapput:

- 1) Iermik sukuluarneqanngitsumik misissuinerup inerner.
- 2) Akuutissanik kemiskiusunik imaluunniit tappiorannartunik, peqqissutsimut ulorianartorsiortitsisinnaasunik peqarnera ilimagineqarpat.
- 3) Siornatigut misissuinerusimasut inerner.
- 4) Iermik pilersuiviup immikkut ittumik mingutsinneqarnera, taakkunungalu atortut tunisassiallu imermut attuunnerini tuniluutsitsineq ilaavoq.
- 5) Pissutsit allat tamatumunnga tunngaviliippata.

Imm. 7. Misissugassanik tigusisarnerit akulikissusaannut tunngavissat, imm. 6 naapertorlugu ilaliunneqartut najukkani pissutsit tunngavigalugit aalajangersarneqartassapput.

Imm. 8. Iermik pilersuivinnik nalinginnaasunik ingerlatsisut nakkutilliinermi oqartussaasunit imermit kemiimut tunngasunik tappiorannartoqassutsinillu misissuiffigineqartussanik tigusisarnermi pilersaarusiornissamut peqquneqarsinnaapput. Nakkutilliinermi oqartussaasut misissugassanik tigusisarnermi pilersaarutit taakku imassaannut sukumiinerusunik piunasaqarsinnaapput, tassungalu ilanngullugu misissugassat tiguneqartussat pilersaarutaasut amerlassusilerneqarnissaat, kiisalu ukiup qanoq ilinerani tigusisoqartarnissaa tigusiffiusussallu sumiinnissaanut piunasaqaateqartoqarsinnaavoq.

Imm. 9. Nakkutilliinermi oqartussaasut ingerlatsisumik suliffeqarfinnillu inuussutissaleriffiusunik avammut tuniniagaqartunik suleqataatitsillutik, ilanngussaq 1-miit 3-mut killissarititaasut tappiorannartunut kemiimullu killissarititaasut allattorsimaffiat annertusisinnaavaat, kiisalu inuussutissanik avammut tuniniagaqarnerup eqqarsaatigineqarnerani tamanna tunngavissaqarpat, ilanngussaq 1-miit 3 ilanngullugu killissarititaasunut taaneqartunut piunasaqaatit sakkortusisinnaallugit. Taamatut allannguisoqassappat, ingerlatsisoq annertuunik aningaasartuuteqartinneqannginnissaa pisariaqarpoq.

§ 21. Ingerlatsisup makkunungalu aningaasartuutit akilissavai:

- 1) iermik misissugassamik tigusineq,
- 2) laboratoriamut nassiussineq aamma
- 3) tappiorannartunut killissarititaasunik § 16, imm. 1-imi aamma 2-mi taaneqartunik misissueqqissaarneq.

§ 22. Laboratoriat, misissoqqissaagassat kemiimut tunngasut inerner, erngup sukuluiagaangitsup erngullu imernejarsinnaasup pitsaassusianik naliliinissamut atugassat piareerpata, erngeluni nakkutilliinermi oqartussaasunut aamma ingerlatsisumut nalunaarutigissavaat.

Imm. 2. Laboratoriat, misissoqqissaagassat tappiorannartoqassutsimut tunngasut inerner, erngup sukuluiagaangitsup erngullu imernejarsinnaasup pitsaassusianik naliliinissamut atugassat piareerpata, erngeluni nakkutilliinermi oqartussaasunut, Kalaallit Nunaanni Nersutaateqarnermut Inuussutissalerinermullu Oqartussaasunut, ingerlatsisumut suliffeqarfinnullu inuussutissalerinermik suliaqartunut, avammut tuniniagaqartunut kalluarnejarsimasinnaasunut nalunaarutigissavaat. Aamma imermik, suliffeqarfinnut inuussutissalerinermik suliaqartunut, avammut tuniniagaqartunut pilersuutaasumik misissueqqissaarnerup inerner Danmarkimi Inuussutissaqarnermut Aqutsisoqarfimmut nalunaarutigineqassapput.

Imm. 3. Aamma laboratoriat, misissueqqissaarnerup inerner imm. 1-imi aamma 2-mi taaneqartut piareerpata, paasissutissanik katersuivimmut nakkutilliinermi oqartussaasut toqqagaannut naqiterlugit immiutissavaat. Inernerit naqitikkat Nakkutilliinermi oqartussaasunit akuerineqassapput.

Imm. 4. Misissueqqissaareriaatsit allat, § 17, imm. 1-imi taaneqartut atorneqassappata, misissueqqissaarnerup inerner inummit, nakkutilliinermi oqartussaasut misissueqqissaarnernut akisussaasutut toqqagaannit nalunaarutigineqartassapput.

Kapitali 5

Nalunaaruteqartarnej

§ 23. Iermik pilersuivimmik nalinginnaasumik ingerlatsisoq ukiumut ataasiarluni imermik pilersuivimmi pineqartumi erngup imernejarsinnaasup pitsaassusia pillugu nalunaarusiortassaaq. Nalunaarusiaq ukiumi ilivitsumi tullermi kingusinnerpaamik juunip ulluisa aallaqqaataanni nakkutilliinermi oqartussaasunut nassiunneqassaaq.

Imm. 2. Nalunaarusiaq uku pillugit paasissutissanik imaqassaaq:

- 1) erngup pitsaassusia,
- 2) imermik pilersuviup imermik pilersuutaasussap annertussusia eqqarsaatigalugu pisinnaasai,
- 3) erngup siaruarternegartup annertussusia,
- 4) innuttaasut, imeqarfimmit pineqartumit pilersorneqartussat, amerlassusaat,

- 5) §§ 35-38 naapertorlugit immikkut ittumik akuersissutit tunniunneqartut, aamma
6) imermik pilersuivimmi, nalunaarut manna naapertorlugu pitsaassusissamut
piumasaqaammik ataatsimik amerlanerusunilluunniit naammassinniffiunngitsumi
pitsaassusissanut piumasaqaatit malinniarlugit iliuusissatut pilersaarutigineqartut.

§ 24. Nakkutilliinermi oqartussaasut ukiut tallimakkaarlugit ukiuni ilivitsuni
qaangiuttuni tallimani erngup pitsaassusianut tunngatillugu eqikkaaffiusumik
nalunaarusiortassapput.

Imm. 2. Nalunaarusiaq ukiup ilivitsup ingerlanerani, piffissap nalunaarusiorfissap
atuuffigisaata naannginnerani tamanut ammasumik saqqummiunneqassaaq.

Kapitali 6

Peqqussuteqarnerit il.il.

§ 25. Nakkutilliinermi oqartussaasut ingerlatsisoq peqqusinnaavaat, erngup
pitsaassusianik aammalu pitsaassutsip apparneranut peqqutaasunik sukumiisumik
misissueqqullugu:

- 1) ilanngussaq 1-miit 3-mut naapertorlugit erngup imerneqarsinnaasup
pitsaassusissaannut piumasaqaatini ataaseq unioqqutinneqarsimappat, imaluunniit
tamanna pillugu pasitsaassisoqarsimappat, aamma
- 2) erngup imerneqarsinnaasutut atornerqarnerani peqqissutsimut
ulorianartorsiortitsisoqarsinnaasoq naliliisoqarpat.

§ 26. Nakkutilliinermi oqartussaasut ingerlatsisunut peqqussuteqarsinnaapput,
aammalu akuutissanik tappiorannartunillu misissuisarnermi pitsaassutsimut
piumasaqaatinut tapiliussanik, nalunaarummut matumunnga ilanngussami
aalajangersarneqanngitsunik aalajangersaasinnaallutik, akuutissat tappiorannartullu
taamaattut peqqissutsimut ulorianartorsiorfusinnaallutik amerlassuseqartut
eqimassuseqartulluunniit naliliisoqarpat.

Imm. 2. Nakkutilliinermi oqartussaasut pisariaqartitsisoqarneranik
naliliinermi, imermik misissugassamik tiguisarfinnik nutaanik
aalajangersaasinnaapput aammalu imermik misissugassamik tiguisarfiit
allanngortissinnaallugit.

§ 27. Nakkutilliinermi oqartussaasut erngup imigassap pitsaassusaanut
qulakkeerinissamut imaluunniit iluarseeqqinnissamut ukuninnga
aallartitseqqullugit ingerlatsisunut peqqusisinnaapput:

- 1) Erngup imerneqarsinnaasup qulakkeernissaanut iliuuserigallagassat.
- 2) Erngup imerneqarsinnaasup pitsaassusiata piujuartussamik iluarseqqinnissaanut iliuitsit pitsannguiffiusut.

Imm. 2. Imm. 1 naapertorlugu peqqussutit tunniunneqarsinnaapput, erngup imerneqarsinnaasup pitsaassusissaanut ilanngussaq 1-miit 3-mut naapertorlugu piumasaqaatit malinneqarsimanngippata, kapitali 4 naapertorlugu nakkutilliinermi misissugassanilluunniit tigusinermi, imaluunniit § 10 naapertorlugu ingerlatsinermik nakkutilliinermi imermik imerneqarsinnaasumik atuineq peqqissutsimut ulorianaateqarsinnaasoq takussutissaqarpat, imaluunniit allanik peqquteqartumik erngup pitsaassusaata qulakkeernissaanut imaluunniit iluarseqqinnissaanut peqqusissuteqarnissaq pisariaqartoq naliliisoqarpat.

Imm. 3. Taamatuttaaq erngup imigassap pitsaassusaani ajornartorsiuteqalernissap pitsaaliornissaanut pisariaqartoq naliliisoqartillugu, nakkutilliinermut oqartussaq ingerlatsisumut peqqusissuteqarsinnaavoq.

§ 28. Peqqussutit §§ 25-27-mi taaneqartut aamma illumik piginnittumut tunniunneqarsinnaapput, nakkutilliinermi oqartussaasut illup pineqartup imermut atortulersuutai ikkuffiiluunniit pisuullutik imermut imerneqarsinnaasumut piumasaqaat ataaseq amerlanerusulluunniit illumi malinneqarsinnaanngitsut qularinngippassuk.

§ 29. Nakkutilliinermi oqartussaasut iluarsiiissutissanik pisariaqartinneqartunik iliuuseqarnissap aallartinneqarnissaata tungaanut, imermik pilersuiviup imaluunniit illup imermut imerneqarsinnaasumut atortuinik atuineramik killiliisinnaapput, tassungalu ilanngullugu erngup atorneqarnera peqqissutsimut ulorianaateqarsinnaasoq naliliisoqarpat qalaassinissamik inassuteqarsinnaallutik.

Imm. 2. Imm. 1-ip atorneqarnerani eqqarsaatigineqassapput:

- 1) imermik imerneqarsinnaasumik atuineramik unitsitsinermut killilersuinernulluunniit atatillugu peqqissutsimut ulorianartorsiorsinnaaneq, tassunga ilanngullugu atuisut imermik imerneqarsinnaasumik qalaassinerannut atatillugu ulorianartorsiorfiusinnaasut,
- 2) atuisunut eqqorneqartunut ilitersuinissaq paasititsinissarlu,
- 3) inerteqquteqarnerup killilersuinernulluunniit atuunnerani imermik imerneqarsinnaasumik pilersuineramik allamik pilersitsinissamut periarfissat,
- 4) tappiorannartoqassutsimut imaluunniit kemiimut pitsaassusissatut piumasaqaat piumasaqaatilluunniit, atuinerup killilersorneqarneranut peqqutaasut, aamma
- 5) qaangiinermut peqqutaasoq qanoq annertutiginersoq, tassungalu ilanngullugu

ukiup qanoq ilinera apeqqutaatillugu imermik sukuluiagaanngitsumik isumalluuteqarfimmi bakteriat annikinnerusumik amerlinerat imaluunniit imermik errortuutikumik imermik pilersuivimmu annertunerusumik kuuttoqarnera.

Imm. 3. Atuinermik killiliineq pillugu nalunaaruteqartoqarsinnaavoq, ilanngussaq 1-miit 3-mut naapertorlugu imermut imerneqarsinnaasumut pitsaassusissatut piumasaqaat malinneqarsimanngippat, imaluunniit kapitali 4 naapertorlugu nakkutilliineq misissugassanillu tigusineq imaluunniit § 9 naapertorlugu ingerlatsinermik nakkutilliineq imermik imerneqarsinnaasumik atuinerup peqqissutsimut ulorianaateqarsinnaaneranik tikkuussippata.

Imm. 4. Atuinermik killiliinissaq taamaallaat imermik imerneqarsinnaasumik imerneq peqqissutsimut ulorianaateqarsinnaasoq pillugu naliliineq tunngavigalugu aalajangerneqarsinnaavoq, nakkutilliinermilu oqartussaasut allamik aalajangiinngippata tamanna suliffeqarfiit inuussutissanik suliaqartut tunisassiornerminni imermik atuinerrannut attuumassuteqanngilaq.

§ 30. § 28 naapertorlugu atuinermik killiliinissamut aalajangiinerit Nakorsaaneqarfimmut tusarniaareernikkut pisassapput.

Imm. 2. Tusarniaaneq oqaasiinnaat atorlugit taamatullu allakkatigut pisinnaavoq, suliap nukingernartuunera apeqqutaatillugu.

Imm. 3. Oqaasiinnaat atorlugit tusarniaaneq sapinngisamik piaartumik allakkatigut uppersaammik malitseqartinneqassaaq.

§ 31. Nakorsaaneqarfiup nakkutilliinermi oqartussaasut peqqusinnaavai, imermik pilersuivinnik nalinginnaasunik allanillu immikkut ittumik misissueqqullugit, kiisalu ikkuffinnik illunilu imermut atortunik misissueqqullugit, imermik pilersuivinnit imaluunniit atortunit taakkunannga imermik atuneq peqqissutsimut tunngatillugu piaartumik iluarsisarialimmik ulorianaateqarsinnaasoq naliliisoqarpat.

Kapitali 7

Atuisunut paasisutissiisarneq

§ 32. Nakkutilliinermi oqartussaasut atuinermik killilersuisoqassappat, tassunga ilanngullugu qalaassinissamik innersuussisoqassappat tusagassiorfinnut nalunaaruteqassappat.

§ 33. Ingerlatsisup nakkutilliinermi oqartussaasut atuineramik killiliinerannik ingerlatsitseqqivigissallugit, taakkununnгалu ilaapput qalaassinissamik inassuteqaateqarnerit, taamatullu paasissutissat assigisaat allat, nakkutilliinermut oqartussap ingerlateqqeqqullugit ingerlatsisumut piumasarisai.

Imm. 2. Taakkua ingerlateqqinneqarnerat qanoq ingerlanneqassanersoq nakkutilliinermut oqartussaq erseqqinnerusunik piumasaqaateqarsinnaapput.

Kapitali 8

Imermut imerneqarsinnaasumut suleqatigiissitaq

§ 34. Nakkutilliinermi oqartussaasut imermut imigassamut suleqatigiissitamik pilersitsissapput.

Imm. 2. Imermut imerneqarsinnaasumut suleqatigiissitaq ataatsimoorluni siunnersuisarfiuvoq, nakkutilliinermi oqartussaasunut siunnersuisarnermik siunertaqartoq.

Imm. 3. Suleqatigiisitaliap pisariaqartitsitillutik nakkutilliisut Peqqissutsimut Naalakkersuisoqarfimmit, Kalaallit Nunaanni Nersutaateqarnermi Inuussutissalerinermilu Oqartussaasunit, Nakorsaaneqarfimmit, imermik pilersuivinnik nalinginnaasunik ingerlatsisunit, kommuninit aamma suliffeqarfinnit inuussutissanik avammut tuniniagaqartunit ilaasortaataitaqartunut qaaqqusisinnaapput. Nakkutilliisuttaaq ataatsimiinnermut attuumassuteqartut allat aamma aggersarsinnaatitaavaat.

Imm. 4. Nakkutilliinermi oqartussaasut siulittaasuutitaqarneq allattoqarfeqarnerlu isumagissavaat.

Imm. 5. Nakkutilliinermi oqartussaasut ataatsimiinnerit amerlassusissaannik aalajangiisassapput.

Imm. 6. Ataatsimiinnernut peqataanissaq nammineerluni piumassutsimik tunngaveqassaaq.

Kapitali 9

Immikkut ittumik akuersissuteqartarnerit

§ 35. Nakkutilliinermi oqartussaasut imermik pilersuivimmik ingerlatsisup qinnuteqarneratigut arrorsinnaanngitsunut killissarititassatut pitsaassutsimut piumasaqaatit, ilanngussaq 2-mi aalajangersarneqartut saneqqunneqarnissaannut immikkut ittumik akuersissuteqarsinnaapput, taamaattoq takuuk § 36.

Imm. 2. Imm. 1 naapertorlugu saneqqutsinissamut immikkut ittumik akuersissuteqarnissamut erngup pitsaassusiata ilanngussaq 2-mi piumasaqaatinut naapertuuttunngorlugu piaartumik iluarsiinialuni iliuuseqartoqarnissaa piumasaqaatigineqarsinnaavoq.

§ 36. § 35 naapertorlugu immikkut ittumik akuersissuteqartoqassappat, iluarsiinialuni iliuusissat pisariaqartut isumaginissaannut pilersaarummik saqqummiussisoqarnissaa piumasarineqarpoq.

Imm. 2. Taamaallaat piffissamut, iluarsiinialuni iliuusissat pisariaqartut suliarineqarnissaannut pisariaqartinneqartumut immikkut ittumik akuersissuteqartoqarsinnaavoq.

Imm. 3. Taamaallaat pitsaassutsimut piumasaqaatit allatut iliorluni naammaginartumik malinniarneqarsinnaanngippata, erngup akuisa qaffasinnerannut akuersissuteqartoqarsinnaavoq. Tassunga ilanngullugu imermik pilersuivimmi iluarsaassinernik assigisaannilluuniit suliaqarnermut atatillugu erngup akuisa qaffasinnerinut akuersissuteqartoqarsinnaavoq.

Imm. 4. Nakkutilliinermi oqartussaasut immikkut ittumik akuersissummik nalunaaruteqarnerminni, qaangiinissat immikkut ittumik akuersissuteqarnermi akuerineqartut qanoq annertutiginissaannut qaffasinnerpaaffiliisussaapput. Killissarititaasut taakku aalajangiiffigineqarnerini, immikkut ittumik akuersissutip innuttaasut peqqissusaannut ulorianartorsiortitsinnginnissaa isumagineqassaaq.

Imm. 5. Ingerlatsisup immikkut ittumik akuersissutip tiguneqarnerani erngerluni imermik pilersuivimmik atuisut immikkut ittumik akuersissuteqartoqarnera pillugu, aammalu tamatumani piumasaqaatit pillugit ilisimatissavai.

Imm. 6. Immikkut ittumik akuersissutit sivilunerpaamik ukiut pingasukkaarlugit atuuttussanngorlugit nalunaarutigineqarsinnaapput.

§ 37. Immikkut ittumik akuersissuteqartoqarnissaanik qinnuteqaat paasissutissanik imaattunik imaqassaaq:

1) Immikkut ittumik akuersissuteqartoqarnermut peqqutaasut sivilussusissaallu.

2) Erngup pitsaassusissaannut piumasaqaatit atuuttut, siornatigut misissueqqissaarnerup inernerit attuumassuteqartut aamma erngup pitsaassusissaannut piumasaqaatit atuuttut saneqqunneqarnissaasa annertussusissaannut naatsorsuutigisat.

3) Nunami sumiiffik, imermut sulumiarneqanngitsumut isumalluutit attuumassutillit, erngup ullormut pilersuutaasartup annertussusia, pilersuineq nalunaarsorlugit, innuttaasunut aamma suliffeqarfinnut inuussutissaleriffiusunut

agguarlugit.

4) Erngup pitsaassusianik nakkutilliinermi misissuisarnissamut pilersaarut, nakkutilliinermi oqartussaasut suleqatigalugit suliarineqartoq, iliuusissanik piffissap immikkut ittumik akuersissuteqarfiusup atuunnerani aalajangiiffigineqartussanik imalik, tassungalu misissuisarnerup akulikinnerusinnaanera ilaatinneqarpoq.

5) Erngup pitsaassusianik qulakkeeriniarluni iluarseeqqinniaryluniluunniit iliuusissat pitsannguutaasussat pisariaqartinneqartut aallartinnissaannut piffissamut suliassanullu pilersaarut.

6) Iliuusissanut pisariaqartinneqartunut suliassat eqikkarneqarnerat.

Imm. 2. Qinnuteqartup nammineerluni paasissutissat attuumassutillit, nakkutilliinermi oqartussaasut suliamik suliaqarnerannut atugassat nassiutissavai.

§ 38. Nakkutilliinermi oqartussaasut naliliinerat malillugu imermut imernejarsinnaasumut pitsaassusissatut piumasaqaatinik qaangiineq ilanngussaq 2 naapertorlugu arrorsinnaanngitsunut, innuttaasut peqqissusaannik ulorianartorsiortitsinngitsunut killissarititassanut tunngasuuppat, aammalu iluarsiiiniarluni iliuuseqarnikkut ajornartorsiut sivisunerpaamik ullut 90-it iluanni iluarsineqarsinnaappat, §§ 35-37 atunngikkaluarlugit immikkut ittumik akuersissuteqartoqarsinnaavoq.

Imm. 2. Imm. 1 naapertorlugu immikkut ittumik akuersissuteqarnermi allassimassapput:

1) qaangiinissap akuerineqartup annerpaaffissaa, aamma

2) ajornartorsiutip iluarsineqarnissaanut sivisunerpaamik ullunik 90-inik piffissaliineq.

Imm. 3. Pissutsit tunngavissaqartitsippata imm. 1 naapertorlugu immikkut ittumik akuersissuteqartoqarsinnaavoq, tassungalu imermik pilersuivimmi taarsersuingaatsiartoqartinnagu qaangiinissap sivikillisinneqarsinnaannginnera ilaatinneqarpoq.

§ 38 Suliffeqarfiit inuussutissanit suliaqartunit immikkut ittumik akuerineqarnissaminik qinnuteqartoqarsimatillugu, Nakkutilliinermi oqartussaasunit nalunaaruteqartoqarsinnaavoq, suliffeqarfiup inuussutissanik suliaqartuusup imermik imernejarsinnaasumik suliffeqarfiup inuussutissanik tunissasiornerminut atatillugu atugassaanik.

Imm. 2. Immikkut ittumik akuersissuteqarnermut imm. 1-mut piumasarineqarpoq, imeq tunisassiarineqartoq, ilanngussani 1-miit 3-mut piumasaqaataasunut

naapertuuttuunersoq. Taamaakkaluartoq immikkut ittumik akuersissuteqartoqarsinnaavoq ataatsimit arlallinnilluunniit ilanngussani 1-miit 3-mut pitsaassusermut piumasaqaataasunut naqissuserneqarpat, erngup pitsaassusissaanut piumasaqaataasunut allaanerunngippat imaluunniit inuussutissanik tunisassiornermik piareerlugit sulianut peqqinnassusaanut imaluunniit peqqinnassusaata tungaasigut tamakkiisumillu pitsaassusissaanut sunniuteqassanngippat.

Immi. 3. Nalinnginnaasumik imermik imerneqarsinnasumik pilersuinerup tamakkiisumik naleqqusarsimanera suliffeqarfinnut inuussutissanik suliaqartunut imermik atuinerat mianeralugu ingerlanneqassasoq, tamannalu immikkut ittumik akuersissuteqarnermut piumasaqarnermut nalunaaruteqarnermi imm. 1 malillugu ingerlanneqassasoq aammalu suliffeqarfiup inuussutissanik suliaqartup imermik imerneqarsinnaasumik tunisassiorup imermik imerneqarsinnaasumik nalinginnaasumik pilersuinerannertunerusumik sunniuteqarfiginngippagu.

Immi. 4. Qinnuteqaat imm. 1 malillugu Qallunaat Nunaanni Inuussutissalerinermi Oqartussaqaarfimmut nassiunneqassaaq, tassanngaanniillu nakkutilliinermut oqartussaasunut Qallunaat Nunaanni Inuussutissalerinermi Oqartussaasunit inassuteqaammik ilaqartillugu ingerlateqqinneqassaaq.

Imm.5 Nakkutilliinermut oqartussaasut imm. 1 malillugu qinnuteqaatip imarisassaanut ersarinnerusumik piumaasaqaateqarsinnaapput.

§ 39. Inuussutissalerinermut suliffeqarfinnit qinnuteqartoqarneratigut, suliffeqarfiup inuussutissanik tunisassiornerani atugassamik, inuussutissalerinermut suliffeqarfiup imermik imerneqarsinnaasumik tunisassiornissaanut, Nakkutilliinermut oqartussaqaat immikkut ittumik akuersissuteqarsinnaavoq.

Imm. 2. Imm. 1 malillugu immikkut ittumik akuersissuteqarnissamut tunngavissaritinneqarpoq, erngup tunisassiarineqartup ilanngussani 1-3-mi pitsaassusissanut piumasaqaatinik naammassinnissimanissaa. Taamaattoq erngup pitsaassusissanut piumasaqaatinik pineqartunit allaassuteqarnera, inuussutissat naammassineqartut peqqinnartuunerannut imaluunniit peqqinnartutut iluseqarnerannut sunniisinnaanngippat, ilanngussani 1-3-mi pitsaassusissanut piumasaqaatit ataatsit arlallilluunniit saneqqunneqarnissaat akuerineqarsinnaavoq.

Imm. 3. Nalinginnaasumik imermik imerneqarsinnaasumik pilersuineq, inuussutissalerinermut suliffeqarfiup pineqartup imermik imerneqarsinnaasumik atuinerannertussusiligaammat, aammattaaq imm. 1 malillugu immikkut ittumik akuersinissamut, inuussutissalerinermut suliffeqarfiup imermik

imerneqarsinnaasumik tunisassiornera nalinginnaasumik imermik
imerneqarsinnaasumik pilersuinnermut annertuunik sunniuteqassanngitsoq,
tunngavissaatinneqarpoq.

Imm. 4. Imm. 1 malillugu qinnuteqaat Danmarkimi Fødevarestyrelsen-imut
nassiunneqassaaq, taassumalu taanna Danmarkimi Fødevarestyrelsen-imiit
inassuteqaammik ilaqartillugu nakkutilliinnermut oqartussamut ingerlateqqissavaa.

Imm. 5. Nakkutilliinnermut oqartussaq imm. 1 malillugu qinnuteqaatip
imarisassaannut erseqqinnerusunik piumasaqaateqarsinnaavoq.

Kapitali 10

Naammagittaalliorsinnaatitaaneq pineqaatissiinerlu

§ 40. Nalunaarut manna naapertorlugu aalajangiinerit, avatangiisinik
innarlitsaaliuinissaq pillugu Inatsisartut inatsisaanni kapitali 14-imi maleruagassat
naapertorlugit suliaassanngortinneqarsinnaapput.

Kapitali 11

Pineqaatissiisarnermut aalajangersakkat

§ 41. Akiliisussanngorlugu eqqartuunneqarsinnaavoq:

- 1) § 3 naapertorlugu nakkutilliinnermi oqartussaasunit tamatumunnga
akuersissummik pissarsitinnani imermik sukuluiagassamik atuisoq.
- 2) § 5-imi piumasarineqartutut imermi imerneqarsinnaasumi pitsaassutsimut
piumasaqaatinik, § 4-mi taaneqartunik malinninnissamik qulakkeerinngitsoq.
- 3) Atortut imermik pilersuivimmut ilaasut aammalu imermut attuumasut § 6-imi
piumasaqaatinik naammassinniffiunissaannik qulakkeerinngitsoq
- 4) § 8 naapertorlugu illup imermut atortuisa peqqussutit malillugit
suliarineqarsimanissaannik qulakkeerinngitsoq.
- 5) § 9 naapertorlugu ingerlatsinnermik nakkutilliinissamut pilersaarummik
pilersitsinngitsoq.
- 6) § 11-mi piumasarineqartutut erngerluni nakkutilliinnermi oqartussaasunut
nalunaaruteqanngitsoq.
- 7) § 12 naapertorlugu ingerlatsinnermi nalunaarsuiffimmut nalunaarsuinngitsoq.
- 8) Piumaffigineqarnermini paasisutissanik allagaatinillu § 13-imi taaneqartunik
saqqummiussisinnaanngitsoq.
- 9) § 16-imi imermik misissugassamik tigusiffissanut piumasaqaatinik

malinninngitsoq.

10) § 18 naapertorlugu imermik misissugassanik tigusiffiusunik paasissutissiinngitsoq.

11) Nakkutilliinermi oqartussaasut § 19 naapertorlugu imermik misissugassanik tigusiniarlutik misissuiniarlutillu iserniarnerini itigartitsisoq.

12) § 22-mi piumasarineqartutut nalunaaruteqanngitsoortoq.

13) § 23-mi piumasarineqartutut nalunaarusiunngitsoortoq.

14) §§ 25-29 naapertorlugit inerteqqutinik, peqqussutinik aalajangiinernilluunniit allanik malinninngitsoortoq.

15) § 33-mi piumasarineqartutut atuinnissamik killiliinernik, tassungalu ilanngullugu qalaassinissamik inassuteqarnermik ingerlatitseqqinngitsoortoq.

16) Kapitali 9 naapertorlugu immikkut ittumik akuersissuteqarnermi piumasaqaatinik unioqqutitsisoq.

Kapitali 12

Atortuulersitsinermut, atorunnaarsitsinermut ikaarsaariarnermullu aalajangersakkat

§ 42. Nalunaarut ulloq 1. oktober 2024 atuutilerpoq.

Imm. 2 Peqatigisaanik erngup imerneqarsinnaasup pitsaassusia aamma imermik pilersuiviit nakkutigineqarnerat pillugit Namminersorlutik Oqartussat nalunaarutaat nr. 63, 4. november 2021-meersoq-atorunnaarsinneqarpoq.

§ 43. Maleruagassat maannamut atuuttuusimasut malillugit aalajangiinerit atuutiinnassapput, nalunaarut manna naapertorlugu nutaamik aalajangiisoqarnissaata tungaanut. Taamatut aalajangiinernik unioqqutitsinerit maleruagassat maannamut atuuttuusimasut malillugit pineqaatissiivigineqartassapput.

Imm. 2. Suliat, nalunaarutip matuma atuutilernerani suliarineqartut, maleruagassat maannamut atuuttuusimasut malillugit naammassineqassapput.

Namminersorlutik Oqartussat, ulloq xx. xxx 2025

Bentiarq Ottosen

Pinngortitamut Avatangiisinullu Naalakkersuisoq

/Natuk Lund Meire